

„დამტკიცებულია“  
სსიპ-კოლეჯის „მერმისი“ დირექტორის  
მოვალეობის შემსრულებლის  
2025 წლის 23. 01. N 04-10 ბრძანებით



### სსიპ - კოლეჯი „მერმისი“ პროფესიული სტუდენტების/მსმენელების შინაგანაწესი

#### მუხლი 1. შინაგანაწესის რეგულირების სფერო, მიზნები

1. საჯარო სამართლის იურიდიული პირის – კოლეჯი „მერმისი“ (შემდგომში – „კოლეჯი“) პროფესიული სტუდენტების/მსმენელების შინაგანაწესი (შემდგომში – შინაგანაწესი) აწესრიგებს სასწავლო პროცესთან დაკავშირებულ ურთიერთობებს, რომელშიც მონაწილე მხარეები არიან კოლეჯი, პროფესიული სტუდენტები და მსმენელები.

#### 2. შინაგანაწესის მიზანია:

- ა) სასწავლო დისციპლინის უზრუნველყოფა;
- ბ) სასწავლო ურთიერთობების რეგულირება საქართველოს მოქმედი კანონმდებლობისა და კოლეჯის სპეციფიკის გათვალისწინებით;
- გ) უსაფრთხო და ჯანსაღი სასწავლო გარემოს უზრუნველყოფა;
- დ) სტუდენტთა და მსმენელთა უფლებებისა და თავისუფლებების დაცვა;
- ე) ეთიკური ნორმების დაცვა და სამართლიანი მოპყრობის უზრუნველყოფა

#### 3. წინამდებარე დოკუმენტით მოწესრიგებულია სასწავლო პროცესთან დაკავშირებული შემდეგი საკითხები:

- ა) პროფესიულ სტუდენტთა/ მსმენელთა და კოლეჯის უფლებები და მოვალეობები;
- ბ) ლექციებიდან და პრაქტიკული მეცადინეობებიდან გათავისუფლების წესები;
- გ) დისციპლინური პასუხისმგებლობა და დისციპლინური გადაცდომები;
- დ) წახალისების მექანიზმები.

4. შინაგანაწესი წარმოადგენს კოლეჯის მიერ პროფესიულ სტუდენტთან, მსმენელთან, პროფესიული სტუდენტის/მსმენელის კანონიერ წარმომადგენელთან დადებული ხელშეკრულების შემადგენელ ნაწილს, თუ მხარეთა შორის გაფორმებული ხელშეკრულებით სხვა რამ არ არის დადგენილი, კოლეჯი ვალდებულია პროფესიულ სტუდენტს/მსმენელს გააცნოს შრომის შინაგანაწესში შეტანილ ცვლილებები, მისი შეტანიდან არაუგვიანეს 14 კალენდარული დღის ვადაში.

5. პროფესიული სტუდენტები და მსმენელები ვალდებული არიან შეასრულონ შინაგანაწესით დადგენილი ნორმები. მათი მიერ შინაგანაწესის ნორმათა დარღვევა შესაძლოა გამოიწვიოს კოლეჯის მიერ დისციპლინური პასუხისმგებლობის ზომების მიღება.

#### მუხლი 2. პროფესიულ სტუდენტთა/მსმენელთა უფლება-მოვალეობები

##### 1. პროფესიულ სტუდენტს/მსმენელს უფლება აქვს:

- ა) მიიღოს სახელმწიფო საგანმანათლებლო სტანდარტების შესაბამისი ხარისხიანი განათლება;
- ბ) მიიღოს აკადემიური და ადმინისტრაციული მხარდაჭერა;

- გ) ჰქონდეს სწავლისათვის შესაფერისი უსაფრთხო გარემო;
- დ) თავისუფლად გამოთქვას საკუთარი აზრი ნებისმიერ საკითხზე;
- ე) იყოს დაცული ყოველგვარი ფიზიკური და მორალური შეურაცხყოფისაგან;
- ვ) ისარგებლოს კოლეჯის მატერიალურ-ტექნიკური ბაზით, ბიბლიოთეკით, საინფორმაციო საშუალებებით და სხვა სასწავლო რესურსებით;
- ზ) მიიღოს ინფორმაცია კოლეჯში არსებული პროფესიული საგანმანათლებლო პროგრამების, პროფესიული საგანმანათლებლო პროგრამის ჩარჩო დოკუმენტის საფუძველზე შექმნილი პროფესიული საგანმანათლებლო პროგრამების პროფესიული მომზადების/გადამზადების პროგრამების და ტრენინგ - კურსების შესახებ;
- თ) მოითხოვოს ცოდნის, უნარებისა და კომპეტენციების სამართლიანი შეფასება.
- ი) საჭიროების შემთხვევაში მოახდინოს აკადემიური პერსონალის მუშაობის შეფასება სპეციალური კითხვარის მიხედვით;
- კ) დადგენილი წესის შესაბამისად ისარგებლოს, კრედიტების აღიარებით, სტუდენტთა მობილობით, პროფესიული სტუდენტის სტატუსის შეჩერების, აღდგენისა და შეწყვეტის უფლებით.
2. პროფესიული სტუდენტი/მსმენელი ვალდებულია:
- ა) იცნობდეს კოლეჯის შინაგანაწესს, დადგენილ წესებს და მასთან გაფორმებულ ხელშეკრულებასთან ერთად განუხრელად იცავდეს მათ;
- ბ) არსებობის შემთხვევაში, დროულად და შესაბამის საბანკო ანგარიშზე კოლეჯის მიერ დადგენილი გრაფიკით, გადაიხადოს სწავლის საფასური, ასევე სხვა ფინანსური დავალიანება და კოლეჯს დაუყოვნებლივ წარუდგინოს საფასურის გადახდის დამადასტურებელი დოკუმენტი;
- გ) პატივისცემით მოექცეს პროფესიულ სტუდენტებს, მსმენელებს, მასწავლებლებს და კოლეჯის სხვა თანამშრომლებს;
- დ) გაუფრთხილდეს კოლეჯის ქონებას, ხოლო მისი ბრალეული ქმედებით დაზიანების შემთხვევაში აანაზღაუროს მიყენებული ზარალი;
- ე) დაიცვას უსაფრთხოების წესები;
- ვ) უმიზეზოდ არ დააგვიანოს და არ გააცდინოს ლექციები/პრაქტიკული მეცადინეობები, ტრენინგ-კურსები; ხოლო გაცდენის შემთხვევაში მოახდინოს კოლეჯის წინასწარი ინფორმირება.
- ზ) ჰქონდეს მოწესრიგებული იერსახე, ჩაიცვას საქმიანად, სასწავლო ატმოსფეროსთან შესაფერისად;
- თ) შეასრულოს მასწავლებლებისა და ადმინისტრაციის წევრების მოთხოვნები, რაც შესაძლებელია არ არის გათვალისწინებული წინამდებარე შინაგანაწესითა და მასთან გაფორმებული ხელშეკრულებით, მაგრამ გამომდინარეობს საგანმანათლებლო მიზნებიდან;
- ი) დროულად აცნობოს კოლეჯს პირად დოკუმენტაციაში მითითებული ინფორმაციის ცვლილების შესახებ;
- კ) გაუფრთხილდეს კოლეჯის პრესტიჟს;
- ლ) დაემორჩილოს და შეასრულოს წინამდებარე შინაგანაწესითა და კოლეჯის დირექტორის ბრძანებებით გათვალისწინებული ვალდებულებები;
- მ) დაიცვას ეთიკისა და ქცევის საყოველთაოდ მიღებული ნორმები;

### მუხლი 3. კანონიერი წარმომადგენლის უფლება-მოვალეობები

1. პროფესიული სტუდენტის/მსმენელის კანონიერ წარმომადგენელს უფლება აქვს:

- ა) მოითხოვოს სასწავლო პროცესში მონაწილეთაგან ნაკისრი ვალდებულებების შესრულება;
- ბ) მიიღოს ინფორმაცია მასწავლებლისა და კოლეჯის ადმინისტრაციისაგან კოლეჯის ფუნქციონირებასა და პროფესიულ სტუდენტთან/მსმენელთან დაკავშირებულ ნებისმიერ საკითხზე;
- გ) მიიღოს ინფორმაცია პროფესიული სტუდენტის/მსმენელის აკადემიური მოსწრებისა და დისციპლინური დარღვევების შესახებ და მოითხოვოს მათი კონფიდენციალურობის დაცვა;



დ) მოსთხოვოს კოლეჯს პროფესიული სტუდენტის/მსმენელის სიცოცხლისა და ჯანმრთელობისათვის უსაფრთხო გარემოს შექმნა.

ე) განახორციელოს კანონმდებლობით მინიჭებული სხვა უფლებამოსილებები.

2. პროფესიული სტუდენტის/მსმენელის კანონიერი წარმომადგენელი ვალდებულია:

ა) რეგულარულად აკონტროლოს პროფესიული სტუდენტის/მსმენელის სასწავლო პროცესში ჩართულობა და ხელშეკრულებით სტუდენტისთვის/მსმენელისათვის დაკისრებული ვალდებულებების შესრულება;

ბ) პროფესიული სტუდენტის/მსმენელის მიერ სასწავლო პროგრამის შეუფერხებლად ათვისების მიზნით აღმოფხვრას მასზე დამოკიდებული ყველა დამაბრკოლებელი გარემოება;

გ) არსებობის შემთხვევაში, დროულად და შესაბამის საბანკო ანგარიშზე კოლეჯის მიერ დადგენილი გრაფიკით, გადაიხადოს სწავლის საფასური;

დ) კოლეჯის მხრიდან შეტყობინების მიღებისთანავე გამოეხმაუროს მას და მოთხოვნის შემთხვევაში გამოცხადდეს მოთხოვნილ ადგილზე;

ე) აანაზღაუროს კოლეჯის პროფესიული სტუდენტის/მსმენელის მიერ მიყენებული მატერიალური ზიანი;

ვ) კოლეჯის ადმინისტრაციასთან და მასწავლებლებთან ურთიერთობისას დაიცვას ეთიკის ნორმები.

ზ) სწავლის საფასურის გადახდის შეუძლებლობის შემთხვევაში დაუყოვნებლივ აცნობოს ამის შესახებ კოლეჯის ადმინისტრაციას;

თ) საქართველოს მოქმედი კანონმდებლობით კანონიერი წარმომადგენლის ვალდებულებებიდან გამომდინარე ხელი შეუწყოს კოლეჯსა და სტუდენტს/მსმენელს შორის სასწავლო ხელშეკრულების შესრულებას.

#### მუხლი 4. კოლეჯის უფლებები და ვალდებულებები

1. კოლეჯი ვალდებულია:

ა) შექმნას პროფესიული საგანმანათლებლო პროგრამის ათვისების, პრაქტიკული ცოდნის, უნარებისა და კომპეტენციების გამომუშავებისათვის, სტუდენტის/მსმენელის მომზადებისა და მაღალკვალიფიციურ სპეციალისტად ჩამოყალიბებისათვის საჭირო აუცილებელი გარემო და პირობები;

ბ) უზრუნველყოს სტუდენტის/მსმენელის ცოდნისა და მიღწევების სამართლიანი შეფასება. არ დაუშვას სტუდენტის/მსმენელის აკადემიური შეფასება მისი დისციპლინის მიხედვით;

გ) უზრუნველყოს სასწავლო პროცესის შეუფერხებელი მიმდინარეობა;

დ) პროფესიული სტუდენტის/მსმენელის მიერ სასწავლო პროგრამის შეუფერხებლად ათვისების მიზნით აღმოფხვრას მასზე დამოკიდებული ყველა დამაბრკოლებელი გარემოება;

ე) დაიცვას პროფესიული სტუდენტი/მსმენელი კოლეჯის თანამშრომლების მხრიდან არასათანადო მოპყრობის, შეურაცხყოფისა და უყურადღებობისგან;

ვ) პროფესიულ სტუდენტს/მსმენელს შესთავაზოს სიცოცხლისა და ჯანმრთელობისათვის უსაფრთხო სასაწავლო გარემო;

ზ) დროულად უზრუნველყოს პროფესიული სტუდენტის/მსმენელის ინფორმირება სასწავლო პროცესთან, სტუდენტის/მსმენელის უფლება-მოვალეობებთან დაკავშირებულ საკითხებზე;

თ) უზრუნველყოს შრომითი ხელშეკრულების დადებამდე პროფესიული სტუდენტისთვის/მსმენელისთვის შრომის შინაგანაწესის გაცნობა.

ი) პროფესიული სტუდენტის მიერ პროფესიული საგანმანათლებლო პროგრამის დასრულების შემდეგ გასცეს შესაბამისი დიპლომი.

კ) მსმენელის მიერ პროფესიული მომზადების/გადამზადების პროგრამის, ტრენინგ-კურსის დასრულების შემდეგ გასცეს შესაბამისი სერტიფიკატი.

ლ) საჭიროების შემთხვევაში მოიძიოს საგანმანათლებლო პროგრამით გათვალისწინებული სასწავლო და საწარმოო პრაქტიკების ობიექტები და აწარმოოს მათთან მოლაპარაკებები, მათ შორის სტუდენტის მიერ საკუთარი ძალებით მოძიებულ პარტნიორ ორგანიზაცია-დაწესებულებებთან.  
მ) კოლეჯი უფლებამოსილია განახორციელოს ყველა ის საქმიანობა, რაც გამომდინარეობს წინამდებარე შინაგანაწესის, სტუდენტთან/მსმენელთან/კანონიერ წარმომადგენელთან გაფორმებული ხელშეკრულებისა და მოქმედი კანონმდებლობის ნორმებიდან.

#### მუხლი 5. პროფესიული სტუდენტის/მსმენელის ლექციიდან გათავისუფლება

1. პროფესიული სტუდენტის/მსმენელის 5 დღის ვადით ლექციიდან/პრაქტიკული მეცადინეობიდან გათავისუფლების უფლებამოსილება ენიჭება კოლეჯის დირექტორის მოადგილეს (სასწავლო დარგში);
2. პროფესიული სტუდენტის/მსმენელის 5 დღეზე მეტი ვადით გათავისუფლების უფლებამოსილება ენიჭება კოლეჯის დირექტორს.
3. არასრულწლოვანი სტუდენტების/მსმენელების უსაფრთხოების უზრუნველსაყოფად, მასწავლებლის მიერ არასრულწლოვანი სტუდენტის/მსმენელის მეცადინეობიდან განთავისუფლება ხორციელდება კოლეჯის დირექტორის მოადგილესთან (სასწავლო დარგში), ხოლო მისი არ ყოფნის შემთხვევაში სასწავლო პროცესის მენეჯერთან შეთანხმებით, არასრულწლოვანი სტუდენტის/მსმენელის მშობელთან/კანონიერ წარმომადგენელთან სატელეფონო კომუნიკაციის შემდეგ.

#### მუხლი 6. კოლეჯის ტერიტორიაზე პროფესიულ სტუდენტთა/მსმენელთა და მესამე პირთა ქცევისა და გადაადგილების წესები

1. კოლეჯში უცხო პირთა შესვლა და გადაადგილება დასაშვებია მხოლოდ კოლეჯის ადმინისტრაციასთან შეთანხმებით და უსაფრთხოებაზე პასუხისმგებელი პირის თანხლებით, დაინტერესებული პირის მოთხოვნის შესაბამისად
2. კოლეჯის ტერიტორიაზე აკრძალულია:
  - ა) ხმაური და მუშაობისათვის ან/და სასწავლო პროცესის სხვაგვარი ხელშეშლა;
  - ბ) აზარტული თამაშები, ალკოჰოლური, ნარკოტიკული საშუალებების და საქართველოს კანონმდებლობით აკრძალული ან სპეციალური ნებართვის გაცემით განსაზღვრული ნივთების (გარდა სამედიცინო დანიშნულების ნივთებისა), აგრეთვე პოლიტიკური და რელიგიური სააგიტაციო, სარეკლამო ფურცლებისა და პროკლამაციების შემოტანა და გავრცელება;
  - გ) პოლიტიკური ხასიათის გამოსვლებისა და მიტინგების მოწყობა;
  - დ) ალკოჰოლური ან ნარკოტიკული ნივთიერებების ზემოქმედების ქვეშ მყოფი პირების შემოსვლა-გადაადგილება;
  - ე) თამბაქოს მოხმარება კოლეჯის შიდა და გარე სივრცეში.
3. კოლეჯის ტერიტორიაზე უსაფრთხოებაზე პასუხისმგებელი პირის სამართლიანი მოთხოვნა ან მითითება სავალდებულოა პროფესიული სტუდენტისთვის/მსმენელისთვის და მესამე პირებისთვის. ქცევის წესების დარღვევის შემთხვევაში მას უფლება ეძლევა მიიღოს საჭირო ზომები დამრღვევის მიმართ, ხოლო თუ ქმედება შეიცავს ადმინისტრაციული სამართალდარღვევის ან/და დანაშაულის ნიშნებს დაუყოვნებლივ მიაწოდოს ინფორმაცია აღნიშნულის შესახებ დირექტორს და გამოიძახოს პოლიცია შესაბამისი რეაგირებისათვის.

#### მუხლი 7. პროფესიულ სტუდენტთა/მსმენელთა წახალისების ზომები

1. სანიმუშო ყოფაქცევისა, სასწავლო პროცესში მიღწეული მაღალი შედეგებისათვის, კოლეჯის, სტუდენტების/მსმენელების და მასწავლებლებისათვის ჩადენილი განსაკუთრებულად მნიშვნელოვანი ქმედებისათვის წესდება პროფესიული სტუდენტის/მსმენელის წახალისების შემდეგი ფორმები:

- ა) მადლობის გამოცხადება;
- ბ) ფასიანი საჩუქრით დაჯილდოება;
- გ) უფასო ექსკურსიის ორგანიზება;
- დ) უფასო ტრენინგ-კურსზე გაშვება;
- ე) კულტურულ, საგანმანათლებლო ან/და სპორტულ ღონისძიებაში ჩართვა;
- ვ) მადლობის სიგელის გადაცემა.

2. შესაძლებელია ერთდროულად გამოყენებულ იქნას წახალისების რამდენიმე ფორმა.

3. პროფესიული სტუდენტის/მსმენელის მიმართ წახალისების ზომების გამოყენების უფლება აქვს კოლეჯის დირექტორს, პროფესიული მასწავლებლის/სასწავლო პროცესის მენეჯერის/დირექტორის მოადგილის (სასწავლო დარგში) მოხსენებითი ბარათის საფუძველზე ან/და საკუთარი ინიციატივით; 4. ინფორმაცია პროფესიული სტუდენტის/მსმენელის წახალისების შესახებ დაინტერესებულ პირებს განეცხადება სიტყვიერად ან/და განთავსდება კოლეჯის საინფორმაციო დაფაზე ან/და კოლეჯის ოფიციალურ ვებ-გვერდზე.

**მუხლი 8. სტუდენტთა/მსმენელთა დისციპლინური გადაცდომა**

1. დისციპლინურ გადაცდომად განიხილება პროფესიული სტუდენტის/მსმენელის შემდეგი ქმედება:

- ა) სასწავლო პროცესის მიმდინარეობის ხელშეშლა;
- ბ) უსაფრთხოების წესების დარღვევა;
- გ) პროფესიული სტუდენტის/მსმენელის, კოლეჯის თანამშრომლის, კოლეჯის ტერიტორიაზე მყოფი უცხო პირის სიტყვიერი ან/და ფიზიკური შეურაცხყოფა;
- დ) ლექციაზე/პრაქტიკულ მეცადინეობაზე არასაკმატო დაგვიანება;
- ე) ლექციის/პრაქტიკული მეცადინეობის არასაკმატო გაცდენა;
- ვ) ლექციის/პრაქტიკული მეცადინეობის მიმდინარეობისას მობილური ტელეფონით სარგებლობა;
- ზ) ლექციის/პრაქტიკული მეცადინეობის მიმდინარეობისას კოლეჯის ადმინისტრაციის თანხმობის გარეშე ვიდეო და აუდიო ჩანაწერების გაკეთება;
- თ) ჩხუბი და ჭიდაობა კოლეჯის შენობაში და მის ტერიტორიაზე;
- ი) კოლეჯის თანამშრომლის ნებართვის გარეშე კოლეჯის ტექნიკის გამოყენება;
- კ) მეცადინეობის დროს კოლეჯის ტერიტორიის დატოვება თვითნებურად;
- ლ) კოლეჯში ალკოჰოლური ან ნარკოტიკული ნივთიერების ზემოქმედების ქვეშ გამოცხადება;
- მ) კოლეჯისათვის მატერიალური ზარალის მიყენება ან ასეთი ზარალის საფრთხის შექმნა;
- ნ) კოლეჯის ტერიტორიაზე ცივი და ცეცხლსასროლი იარაღის ტარება;
- ო) კოლეჯის ტერიტორიაზე ასაფეთქებელი ნივთიერებების შემოტანა და აფეთქება;
- პ) კოლეჯისა და პროფესიული სტუდენტის პატივისა და ღირსების შემლახველი ქმედება მისი ჩადენის ადგილის მიუხედავად;
- ჟ) ნარკოტიკული ან/და ალკოჰოლური ან მისი შემცველი საშუალებების კოლეჯში მოტანა/გავრცელება/მოხმარება;
- რ) თამბაქოს მოხმარება კოლეჯის მთელ ტერიტორიაზე, მათ შორის კოლეჯის ეზოში;
- ს) კოლეჯში სტუდენტისათვის/მსმენელისათვის შეუფერებელი იერსახით გამოცხადება.
- ტ) კოლეჯში სტუდენტისათვის/მსმენელისათვის შეუფერებელი სამოსით გამოცხადება, კერძოდ:
  - ტ.ა) გამომწვევი სამოსით;
  - ტ.ბ) სამოსით, რომელზეც დატანილია შეურაწმყოფელი ან სტუდენტის/მსმენელის სტატუსისათვის შეუფერებელია ნახატი ან წარწერა;
  - ტ.გ) სამოსით, რომელიც რეკლამას ან აგიტაციას უწევს პოლიტიკურ პარტიას;
  - ტ.დ) სამოსით, რომელიც რეკლამას ან აგიტაციას უწევს კანონით აკრძალულ ქმედებას.
- უ) შეფასების მიმდინარეობისას სხვა სტუდენტისათვის დახმარების გაწევა;



ფ) სტენდზე გავრული განცხადებების დაზიანება (ჩამოხვევა, ჩამოხსნა) რითაც ხელი შეუშალა თანამშრომლებისათვის ან/და სტუდენტებისათვის/მსმენელებისათვის განკუთვნილი ინფორმაციის გავრცელებას;

ქ) შეფასების დროს გადასაწერი მასალის (ე.წ. "შპარგალკა") გამოყენება;

ღ) სტუდენტებისათვის/მსმენელებისათვის ან/და მასწავლებლებისათვის ან/და თანამშრომლებისათვის განზრახ ცრუ ინფორმაციის მიწოდება, რის გამოც ჩაიშალა მეცადინეობა;

ყ) მეცადინეობის ჩაშლა;

შ) კოლეჯის ტერიტორიის დაზიანება;

ჩ) სანიტარულ-ჰიგიენური ნორმების დარღვევა;

ც) სხვა გარემოება.

2. დისციპლინურ პასუხისმგებლობას ექვემდებარება ამ მუხლში ჩამოთვლილი დისციპლინური ქმედებების ჩადენა და მათი ჩადენის მცდელობაც.

3. სტუდენტის/მსმენელის დისციპლინური გადაცდომის შემთხვევაში, დისციპლინური პასუხისმგებლობის ზომის გამოყენება ხორციელდება წინამდებარე შინაგანაწესით განსაზღვრული დასაქმებულისათვის დისციპლინური პასუხისმგებლობის დაკისრებისათვის დადგენილი წესებით.

4. დაუშვებელია სტუდენტის/მსმენელის დისციპლინური დევნა ქმედებისათვის, რომელიც მან ჩაიდინა სასწავლო დროისაგან თავისუფალ დროს კოლეჯის ტერიტორიის გარეთ, გარდა იმ შემთხვევისა, როდესაც კოლეჯს აქვს დასაბუთებული კანონიერი ინტერესი.

5. არასრულწლოვანი სტუდენტის/მსმენელის დისციპლინური წარმოების დაწყების შესახებ დაუყოვნებლივ უნდა ეცნობოს მის კანონიერ წარმომადგენელს.

6. დისციპლინური გადაცდომის გამოვლენის შემთხვევაში პირი, რომელმაც იგი გამოავლინა კოლეჯის დირექტორის სახელზე ადგენს მოხსენებით ბარათს და აღწერს ქმედებას, შესაბამისი დროის, თარიღისა და სხვა არსებითი მნიშვნელობის საკითხების მითითებით.

7. დისციპლინური პასუხისმგებლობის შესახებ საბოლოო გადაწყვეტილებას იღებს დირექტორი, რაც ფორმდება შესაბამისი ინდივიდუალური ადმინისტრაციულ-სამართლებრივი აქტით.

8. იმ შემთხვევაში, როდესაც არსებობს საფუძვლიანი ვარაუდი, რომ სტუდენტი ფლობს შინაგანაწესით აკრძალულ ნივთს, კოლეჯი უფლებამოსილია გაატაროს შესაბამისი ზომები.

მუხლი 9. სტუდენტთა/მსმენელთა დისციპლინური პასუხისმგებლობის ზომები

1. პროფესიულ სტუდენტთა/მსმენელთა მიმართ შესაძლებელია გამოყენებული იქნას დისციპლინური პასუხისმგებლობის შემდეგი ზომები:

ა) გაფრთხილება;

ბ) საყვედური;

გ) სასტიკი საყვედური;

დ) სტუდენტის/მსმენელის სტატუსის შეწყვეტა.

2. ერთი დისციპლინური გადაცდომისთვის შესაძლებელია გამოყენებული იქნას დისციპლინური პასუხისმგებლობის მხოლოდ ერთი ზომა.

3. პროფესიული სტუდენტის/მსმენელის მიმართ დისციპლინური პასუხისმგებლობის დაკისრების უფლება აქვს კოლეჯის დირექტორს, პროფესიული მასწავლებლის/სასწავლო პროცესის მენეჯერის/დირექტორის მოადგილის (სასწავლო დარგში) მოხსენებითი ბარათის საფუძველზე ან საკუთარი ინიციატივით;

4. დისციპლინური პასუხისმგებლობა დაკისრებული უნდა იქნას I (ერთი) თვის განმავლობაში იმ დღიდან, როდესაც კოლეჯის დირექტორისათვის ცნობილი გახდა მომხდარი გადაცდომის შესახებ.

5. დისციპლინური პასუხისმგებლობის გამოყენება არ ათავისუფლებს გადაცდომის ჩამდენ პირს იმ ვალდებულებების შესრულებისაგან, რომლის შეუსრულებლობისათვის შეეფარდა პასუხისმგებლობის ზომა.

6. დისციპლინური პასუხისმგებლობის დაკისრებისას უნდა შეგროვდეს საქმისათვის მნიშვნელობის მქონე მტკიცებულებები, დასაქმებულს განემარტოს კონკრეტულად რომელი ნორმის დარღვევაში არის მის მიმართ ეჭვი და მოეთხოვოს შესაბამისი განმარტება, დაესვას შეკითხვები მას და დასაქმებულს დაკავშირებულ სხვა პირებს, დასაქმებულს ჩამოერთვას ახსნა-განმარტება, სათანადოდ შესწავლილ იქნას გარემოებები, დადგინდეს გადაცდომის ჩადენაში დასაქმებულის შემხებლობის და მონაწილეობის ხარისხი.

7. პროფესიული სტუდენტი/მსმენელი ვალდებულია, მოთხოვნისთანავე დაუყოვნებლივ წარმოადგინოს ახსნა-განმარტება.

8. დისციპლინური პასუხისმგებლობის ზომის შეფარდებისას მხედველობაში მიიღება გადაცდომის სიმძიმე, მისი ჩადენის გარემოებები, დისციპლინური სამართალდამრღვევის ჩამდენი პიროვნება, მისი მონაწილეობის ხარისხი და სხვა ობიექტური გარემოებები.

9. დისციპლინური პასუხისმგებლობის ზომის გამოყენების შესახებ აღნიშვნა კეთდება სტუდენტის პირად საქმეში.

**მუხლი 10. დისციპლინური პასუხისმგებლობის გაქარწყლება**

თუ პროფესიულ სტუდენტს ორი თვის განმავლობაში არ შეეფარდა ახალი დისციპლინური პასუხისმგებლობის ზომა, იგი ითვლება დისციპლინური პასუხისმგებლობის არმქონე პირად.

**მუხლი 11. პროფესიული სტუდენტის/მსმენელის პირადი საქმე**

1. პროფესიული სტუდენტის/მსმენელის „პირადი საქმე“ იქმნება და მას აწარმოებს კოლეჯის დირექტორის განსაზღვრული საამისოდ უფლებამოსილი პირი.

2. პროფესიული სტუდენტის/მსმენელის პირადი საქმე მოიცავს საბუთების მიღების ეტაპზე წარმოდგენილ ყველა დოკუმენტს:

ა) პირადი (კანონიერი წარმომადგენლის) განცხადება, რომელიც უნდა აკმაყოფილებდეს საქართველოს ზოგადი ადმინისტრაციული კოდექსის 78-ე მუხლით დადგენილ მოთხოვნებს;

ბ) პირადობის დამადასტურებელი დოკუმენტი;

გ) აპლიკანტის არასრულწლოვნების შემთხვევაში, კანონიერი წარმომადგენლის პირადობის დამადასტურებელი დოკუმენტის და კანონიერი წარმომადგენლობის დამადასტურებელი დოკუმენტის ასლი;

დ) 1 ფერადი ფოტოსურათი ზომით 3x4-ზე;

ე) პროფესიული საგანმანათლებლო პროგრამის/პროფესიული მომზადების პროგრამის/პროფესიული გადამზადების პროგრამის მოთხოვნის შესაბამისად საბაზო ან სრული ზოგადი განათლების დამადასტურებელი დოკუმენტის ან განათლების დამადასტურებელი იმ დოკუმენტის დედანის ასლი, რომლის მიღებაც შეუძლებელი იქნებოდა საბაზო (სრული) ზოგადი განათლების მიღების გარეშე.

ვ) 17 წელს მიღწეული პროფესიული სტუდენტის შემთხვევაში (გარდა იმ პირისა, რომელიც წვევამდელთა სამხედრო აღრიცხვას არ ექვემდებარება) წვევამდელის სამხედრო აღრიცხვაზე ყოფნის ან წვევამდელის სამხედრო აღრიცხვიდან მოხსნის დამადასტურებელი დოკუმენტი.

ზ) დისციპლინის დარღვევის ან/და წახალისების ზომის გამოყენების შესახებ კოლეჯის დირექტორის ინდივიდუალური ადმინისტრაციულ-სამართლებრივი აქტებს;

თ) მასთან გაფორმებულ ხელშეკრულებას.

ი) ნებისმიერ ისეთ დოკუმენტს, რომელიც პირდაპირ და უშუალო კავშირშია პროფესიული სტუდენტის/მსმენელის სტატუსის მოპოვებასთან, პროფესიული სტუდენტის/მსმენელის უფლებებსა და მოვალეობებთან.

3. პროფესიული სტუდენტის/მსმენელის პირად საქმეში მოთავსებული დოკუმენტაცია წარმოადგენს კოლეჯის საკუთრებას (გარდა უშუალოდ დედნის სახით წარმოდგენილი დოკუმენტისა) და რჩება კოლეჯში.

#### მუხლი 12. დასკვნითი დებულებები

1. პროფესიული სტუდენტის სტატუსის მოპოვების, სტატუსის შეჩერების და შეწყვეტის, მობილობის, მიღებული განათლების აღიარების, პროფესიული საგანმანათლებლო პროგრამის/პროგრამის შეცვლისა და გაუქმების საკითხებს, ასევე სტუდენტის შემდგომი განათლებით უზრუნველყოფის მექანიზმებს განსაზღვრავს კოლეჯის დირექტორის მიერ ინდივიდუალური ადმინისტრაციული აქტით დამტკიცებული წესები.

2. პროფესიულ სტუდენტთა/მსმენელთა მიერ შინაგანაწესის შესრულების კონტროლს ახორციელებს დირექტორის მოადგილე სასწავლო დარგში.

3. შინაგანაწესის შესრულების მონიტორინგის შედეგები საბოლოო ჯამში წარედგინება კოლეჯის დირექტორს, რომელიც უფლებამოსილია შინაგანაწესის ნორმების შეუსრულებლობის შემთხვევაში, გამოიყენოს დისციპლინური პასუხისმგებლობის ზომები.